



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Sumáriu Kazu 2014**  
**Tribunál Distritál Suai**  
**Setembru 2014**

**Sumáriu prosesu julgamentu kazu iha Tribunál Distritál Suai -  
Periódú Setembru 2014**

*Introdusaun*

Iha fulan Setembru 2014, JSMP kontinua hala' o monitorizasaun ba prosesu julgamentu kazu iha Tribunál Distritál Suai. Durante periódú ne'e, JSMP konsege monitoriza kazu hamutuk 27 hosi kazu 53 ne'ebé Tribunál Distritál Suai julga.

Kazu hirak ne'e kompostu hosi krime ofensa ba integridade fízika simples 2, ofensa ba integridade fízika simples ho natureza violénsia doméstika 19, furtu agravadu 1, korupsaun pasiva ho aktu lísitu 1, falsifikasaun ba dokumentus 1, danu agravadu 1, koasaun seksuál 1 no abuzu seksuál ba menóridade 1.

Hosi kazu sira ne'e, tribunál konsege konklui prosesu ba kazu 16, no sei kontinua prosesu ba kazu hamutuk 11.

Tuir mai deskripsaun sumáriu kazu kompletu :

**1. Kazu krime ofensa ba integridade ba fízika simples ho natureza violénsia doméstika -  
Nú. Prosesu : 233/pen/2013/TDS**

|                      |                           |
|----------------------|---------------------------|
| Kompozisaun Tribunál | : Juis singulár           |
| Juis                 | : Dra. Florensia Freitas  |
| Ministériu Públiku   | : Dr. Jose Elo            |
| Defeza               | : Dr. João H. de Carvalho |
| Konkluzsaun          | : Adia                    |

Iha 05 Setembru 2014, Tribunál Distritál Suai adia prosesu julgamentu ba kazu ofensa ba integridade fízika simples ne'ebé involve arguidu EC hasoru AIT. Kazu ne'e akontese iha 29 Setembru 2013, iha Distritu Suai.

Prosesu julgamentu ba kazu ne'e adia tanba arguidu la marka prezensa mesmu tribunál notifikasi ona.

## **2. Kazu krime furtu agravadu - Nú. Prosesu : 136/pen/2012/TDS.**

Kompozisaun Tribunál : Koletivu  
Juis : Dr. Alvaro Maria Freitas, Dr. Costãncio B. Basmery no  
Dr. Argentino Luisa Nunes  
Ministériu Públiku : Dr. Jose Elo  
Defeza : Dr. Jose do Rego  
Konkluzan : Kondena pena prizaun tinan 2 suspende ba tinan 3

Iha 05 Setembru 2014, Tribunál Distritál Suai kondena arguidu CA ho pena prizaun tinan 2 no suspende ba tinan 3 tanba arguidu provadu komete krime furtu agravadu hasoru Estadu. Kazu ne'e akontese iha 13 Marsu 2012, iha Distritu Suai.

Ministériu Públiku akuza katak iha 13 Marsu 2012, arguidu lori ai-suak besi ba sobu no selok odamatan Armazen Eskola Pre-Sekundaria no arguidu foti fos saku 9, mina bimoli jerigen 2 inklui osan ho valor hamutuk US\$158,00 ne'ebé programa merenda eskolar nian.

Iha prosesu julgamentu arguidu rekoñese no konfesa totalmente ba faktus sira ne'ebé ministériu públiku akuza hasoru nia. Arguidu mós arrepende nia hahalok no prontu atu fó fila osan no sasan ne'ebé nia foti iha tempu semana rua nia laran.

Ministériu Públiku akuza arguidu kontra artigu 252 Kódigu Penál kona-ba furtu agravadu ne'ebé nia moldura penal husi tinan 2 to'o tinan 8 prizaun.

Iha alegasaun finál, ministériu públiku husu ba tribunál atu arguidu fó fila fali sasan sira ne'ebé mak nia foti.

Defeza husu ba tribunál atu fó pena ne'ebé justu ba arguidu tanba arguidu konfesa loloos tuir faktus no provas ne'ebé mak nia halo.

Bazeia ba faktu sira ne'ebé produz durante julgamentu, tribunál konklui kazu ne'e hodi kondena arguidu ho pena prizaun tinan 2 suspende ba tinan 3.

## **3. Kazu krime korrupsaun passiva ho aktu lísitu - Nú. Prosesu : 185/pen/2014/TDS**

Kompozisaun Tribunál : Koletivu  
Juis : Dr. Pedro R. de figeiredo, Dr. Costãncio B. Basmery no  
Dr. Argentino Luisa Nunes

Ministériu Públiku : Dra. Benvinda da Costa Rosario  
Defeza : Dr. Marçal Mascarenhas no Dr. Arlindo Sanches  
Konkluzau : Omologa prosesu no absolve arguidu

Iha 16 Setembru 2014, Tribunál Distritál Suai absolve arguidu JG, GFdS, JBFA, LCC no NYH ne'ebé involve iha kazu korrupsaun passiva hasoru Estadu. Kazu ne'e akontese iha 21 Jullu 2006 iha Distritu Suai.

Bazeia ba prosesu produsaun ba provas antes, iha alegasaun finál, ministériu públiku husu ba tribunál atu kondena arguidu sira ho pena suspensaun tanba involve iha kazu korrupsaun passiva kontra estadu.

Defeza husu ba tribunál atu absolve arguidu sira husi prosesu ne'e tanba faktus no provas la sufisiente.

Depois avalia faktu sira ne'ebé produz durante julgamentu antes, tribunál konklui kazu ne'e no absolve arguidu sira tanba laiha prova sufisiente hodi kondena arguidu sira.

#### **4. Kazu krime falsifikasaun ba dokumentus - Nú. Prosesu : 07/pen/2012/TDS**

Kompozisaun Tribunál : Koletivu  
Juis : Dr. Alvaro Maria Freitas, Dr. Pedro R. de Figueiredo no  
Dr. Argentino L. Nunes  
Ministériu Públiku : Dr. Jose Elo  
Defeza : Dr. Manuel Amaral  
Konkluzau : Adia

Iha 17 Setembru 2014, Tribunál Distritál Suai adia julgamentu ba kazu krime falsifikasaun ba dokumentus ne'ebé involve arguidu AdJJ hasoru GdJ. Kazu ne'e akontese iha Suai, Distritu Suai.

Julgamentu ne'e adia tanba tribunál la prenxe juis koletivu no ministeriu públiku mós la marka prezensa iha loron julgamentu. Tanba impedimentu ne'e, tribunál marka fila fali prosesu julgamentu ba iha 22 Outubru 2014, 02:30 lorokraik.

#### **5. Kazu krime danu agravadu - Nú. Prosesu : 31/pen/2013/TDS**

Kompozisaun Tribunál : Koletivu  
Juis : Dr. Pedro R. de Figueirera, Dr. Alvaro M. Freitas no Dr.  
Argentino Luisa N.

Ministériu Públiku : Dr. Mateus Nessi  
Defeza : Dr. Manuel Amaral  
Konkluzau : Sei kontinua prosesu

Iha 18 Setembru 2014, Tribunál Distritál Suai hala'o prosesu julgamentu ba kazu danu agravadu ne'ebé involve arguidu AdR hasoru SMG. Kazu ne'e akontese iha 11 Outubru 2013, iha Suku Casabauk, iha Distritu Suai.

Ministériu Públiku akuza arguidu katak iha 11 Outubru 2013, arguidu baku rahun lezadu ninia sasan iha uma laran no sunu lezada nia uma.

Ministériu Públiku akuza arguidu kontra artigu 259 Kódigu Penál kona-bá danu agravadu ne'ebé nia moldura penal husi tinan 3 to'o tinan 8 prizaun.

Iha prosesu julgamentu arguidu deklara katak nia la hatene kona-ba akontesimentu ne'e, tanba iha momentu ne'ebá nia sofre hela moras mental. Maibé arguidu deklara katak nia arrepende ninia hahalok depoisde nia rona hosi ema seluk katak nia mak estraga no sunu uma ne'e.

Maske nune'e, wainhira arguidu rekopera fali hosi moras mental, arguidu entrega osan US\$2,000 ba lezadu hodi hadia fila fali nia uma no sosa fali sasan sira ne'ebé arguidu estraga.

Testemuña AX nu'udar infermeiru moras mental nian depoimentu katak loos duni arguidu moras mental hanesan *depressaun* no durante ne'e halo hela tratamentu antes nia halo krime ne'e.

Iha alegasaun finál, ministériu públiku husu ba tribunál atu kondena arguidu ho pena prizaun maibé suspende tiha.

Entretantu defeza husu ba tribunál atu tetu didi'ak kazu ne'e no aplika pena ne'ebé kmaan no justu ba arguidu tanba wainhira arguidu komete krime ne'e nia iha kondisaun moras mental.

Depois rona tiha parte sira, tribunál marka fila fali prosesu julgamentu ba iha 30 Setembru 2014, iha tuku 14:30 lokoraik ho agenda leitura akordaun.

## **6. Kazu krime koasaun seksuál - Nú. Prosesu : 163/pen/2013/TDS**

Kompozisaun Tribunál : Koletivu  
Juis : Dr. Pedro R. de Figueredo Dr. Argentino Luisa Nunes  
no Dr. Alvaro M. Freitas  
Ministériu Públiku : Dr. Mateus Nesi  
Defeza : Dr. Manuel Amaral  
Konkluzau : Sei kontinua prosesu

Iha 18 Setembru 2014, Tribunál Distritál Suai hala' o julgamentu ba kazu krime koasaun seksuál ne'ebé involve arguidu LO hasoru CMM. Kazu ne'e akontese iha 03 Maiu 2014, iha Distritu Suai.

Ministériu Públiku akuza katak iha 03 Maiu 2014, wainhira lezada ba toba iha arguidu nia uma, iha kalan arguidu ameasa no tenta atu halo relasaun seksuál ho lezada maibé la konsege.

Ministeriu Públiku akuza arguidu kontra artigu 171 Kódigu Penál kona-ba koasaun seksuál konjugadu ho artigu 157 Kódigu Penál kona-ba amaesa.

Iha prosesu julgamentu arguidu konfesa, rekoñese katak nia komete duni aktus ne'ebé haktuir iha akuzasaun. Arguidu mós deklarata katak nia arrepende ba nia hahalok no rezolve kazu ne'e tuir lisan ka adat Timor nian. Arguidu entrega osan US\$400 no tais ida ba lezada no lezada nia família nu'udar simbolu hodi taka lezada nia moe.

Alende ne'e, lezada mós kontinua konfirma faktu sira iha akuzasaun ministériu públiku no deklarata katak kazu ne'e rezolve ona tuir lisan ka adat timor nian hanesan arguidu hateten.

Iha alegasaun finál, ministériu públiku husu ba tribunál atu kondena arguidu ho pena ne'ebé adekua. Defeza husu ba tribunál atu absolve arguidu husi prosesu ne'e tomak tanba arguidu ho lezada rezolve ona kazu ne'e tuir lisan timor nian.

Depois rona tiha parte sira, tribunál marka fila fali ba iha 30 Setembru 2014, tuku 02:30 lorokraik ho agenda leitura akordaun.

## **7. Kazu krime ofensa ba integridade ba física simples ho natureza violénsia doméstika - Nú. Prosesu : 176/pen/2014/TDS**

|                      |                                |
|----------------------|--------------------------------|
| Kompozisaun Tribunál | : Singulár                     |
| Juis                 | : Dr. Costáncio Barros Basmery |
| Ministériu Públiku   | : Dr. Antonio da Silva Tavares |
| Defeza               | : Dr. Manuel Amaral            |
| Konkluzau            | : Kondena pena multa US\$90,00 |

Iha 19 Setembru 2014, Tribunál Distritál Suai kondena arguidu MG ho pena multa US\$90,00 no selu kustu judisiál US\$20,00, tanba arguidu provadu komete krime ofensa ba integridade física simples hasoru nia feen. Kazu ne'e akontese iha 25 Maiu 2014, iha Distritu Suai.

Antes ne'e, ministériu públiku akuza katak iha 25 Maiu 2014, arguidu tuku dala ida iha lezada nia kotuk laran no rezulta lezada sente moras no bubu iha nia kotuk laran. Kazu ne'e akontese tanba lezada trata arguidu relasiona ho arguidu nia telefone mate wainhira lezada kontaktu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika.

Iha prosesu julgamentu arguidu konfesa no rekoñese totalmente ba faktus ne'ebé ministériu públiku akuza hasoru nia. Entretantu lezada deklara katak faktu sira loos hotu hanesan haktuir iha akuzasaun, maibé nia perdua ona arguidu.

Iha alegasaun finál, ministériu públiku husu ba tribunál atu aplika suspensaun ba pena prizaun ba arguidu. Entretantu defeza husu ba tribunál atu aplika pena multa ba arguidu tanba arguidu ho lezada di'ak malu ona, moris hamutuk nu'udar feen ho laen hanesan bai-bain no nunca mosu problema to'o agora.

Depois avalia faktu sira ne'ebé produz durante julgamentu no refere ba konfisaun arguidu nian, tribunál konklui prosesu ne'e no kondena arguidu ho pena multa US\$90,00 ne'ebé arguidu sei selu kada loron US\$ 1,00 durante loron 90 plus kustu judisiál US\$20,00. Tribunál mós aplika pena alternativu durante loron 40 iha prizaun kuandu arguidu la selu pena multa refere.

#### **8. Kazu krime ofensa ba integridade ba fízika simples ho natureza violénsia doméstika - Nú. Prosesu: 144/pen/2014/TDS**

|                      |   |
|----------------------|---|
| Kompozisaun Tribunál | : Singulár  |
| Juis                 | : Dr. Costáncio Barros Basmery                        |
| Ministériu Públiku   | : Dr. Mateus Nesi                                     |
| Defeza               | : Dr. Marcal Mascarenhas no Dr. Rafael Gusmão         |
| Konkluzau            | : Kondena ho pena prizaun tinan 1 suspende ba tinan 2 |

Iha 24 Setembru 2014, Tribunál Distritál Suai liuhosi tribunál movel iha Distritu Bobonaro kondena arguidu AJG ho pena prizaun tinan 1 suspende ba tinan 2 tanba provadu komete krime ofensa ba integridade fízika simples hasoru nia feen. Kazu ne'e akontese iha 04 Fevereiru 2014, iha Distritu Bobonaro.

Ministériu Públiku haktuir katak iha 04 Fevereiru 2014, arguidu basa lezada dala ida iha ibun, dala ida iha rentos no dala ida iha ulun. Aktus ne'e rezulta lezada sofre moras iha rentos, ulun no bubu iha ibun. Kazu ne'e akontese tanba lezada fó impresta osan US\$50,00 ba nia maun no seidauk fo fila.

Iha prosesu produsaun ba provas, arguidu konfesa no rekoñese katak nia komete duni krime ne'e hasoru nia fen. Alende ne'e, lezada deklar arguidu baku duni nia maibé tuku la'os basa. Maibé depois de akontesimentu nia rasik perdua ona arguidu no to'o agora sira hela hamutuk nu'udar feen no laen.

Iha alegasaun final, ministériu públiku husu ba tribunál atu aplika suspensaun ba pena prizaun ba arguidu. Defeza husu ba tribunál atu kondena arguidu ho pena ne'ebé kmaan tanba arguidu ho lezada di'ak malu ona no agora sira hela hamutuk nu'udar feen ho laen hanesan bai-bain no nunka mósu problema to'o agora.

Depois avalia faktu sira ne'ebé produz durante julgamentu no refere ba konfisaun arguida nian, tribunál prova katak arguida komete duni krime ne'e hasoru nia feen. Tanba ne'e, tribunál kondena arguidu ho pena prizaun tinan 1 suspende ba tinan 2.

### **9. Kazu krime ofensa ba integridade ba física simples ho natureza violénsia doméstika - Nú. Prosesu : 166/pen/2014/TDS**

|                      |   |
|----------------------|---|
| Kompozisaun Tribunál | : Singulár  |
| Juis                 | : Dr. Costácio Barros Basmery                         |
| Ministériu Públiku   | : Dr. Mateus Nessi                                    |
| Defeza               | : Dr. Marçal Mascarenhas no Dr. Rafael Gusmão         |
| Konkluzau            | : Kondena ho pena prizaun tinan 1 suspende ba tinan 2 |

Iha 24 Setembru 2014, Tribunál Distritál Suai, liuhosi tribunál movel iha Distritu Bobonaro, kondena arguidu AS ho pena prizaun tinan 1 no suspende ba tinan 2 no selu kustu judisiál US\$35,00. Tribunál prova katak arguidu komete duni krime ofensa ba integridade física simples hasoru nia feen. Kazu ne'e akontese iha 04 Maiu 2014, iha Distritu Bobonaro.

Ministériu Públiku akuza katak iha 04 Maiu 2014, arguidu tebe dala barak iha lezada nia isin no rezulta moras no bubu iha lezada nia isin. Kazu ne'e akontese tanba arguidu diskunfia lezada ho mane seluk.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 alineaia (b) Lei Kontra Violénsia Doméstika.

Iha prosesu julgamentu arguidu konfesa totalmente ba faktus sira hosi akuzasaun ministériu públiku. Alende ne'e, lezada mós continua konfirma faktu sira ne'e, maibé deklar katak nia perdua ona arguidu, sira hela hamutuk nu'udar feen ho laen hanesan bai-bain no nunka mosu problema to'o agora.

Iha alegasaun finál, ministériu Públiku husu ba tribunál atu aplika suspensaun ba pena prizaun ba arguidu tanba provadu prátika violénsia hasoru nia feen.

Enkuantu, defeza husu ba tribunál atu aplika pena ne'ebé kmaan ba arguidu tanba arguidu no lezada di'ak malu ona no sira agora hela hamutuk nu'udar feen no laen nomos nunca mosu problema to'o agora.

Tribunál konklui prosesu kazu ne'e no kondena arguidu ho pena prizaun tinan 1 no suspende ba tinan 2 inklui selu kustu judisál US\$35,00 ba arguidu.

### **10. Kazu krime ofensa ba integridade ba fízika simples ho natureza violénsia doméstika - Nú. 138/pen/2014/TDS**

|                      |   |
|----------------------|---|
| Kompozisaun Tribunál | : Singulár  |
| Juis                 | : Dr. Costácio Barros Basmerly                        |
| Ministériu Públiku   | : Dr. Mateus Nesi                                     |
| Defeza               | : Dr. Marçal Mascarenhas no Dr. Rafael Gosmao         |
| Konkluzau            | : Kondena ho pena prizaun tinan 2 suspende ba tinan 3 |

Iha 24 Setembru 2014, Tribunál Distritál Suai liuhosi tribunál movel iha Distritu Bobonaro kondena arguidu CdS ho pena prizaun tinan 1 suspende ba tinan 2. Tribunál prova katak arguidu komete duni krime ofensa ba integridade fízika simples hasoru nia feen. Kazu ne'e akontese iha 10 Marsu 2014, iha Distritu Bobonaro.

Ministériu Públiku akuza katak iha 10 Marsu 2014, arguidu tuku lezada dala ida iha nia rentos, rakut lezada nia matan fukun, kous lezada no soe ba rai. Aktu hirak ne'e rezulta lezada hetan moras iha rentos no kanek no bubu iha lezada nia matan fukun sorin. Kazu ne'e akontese tanba arguidu lanu todan hela obriga lezada atu halo relasaun seksuál maibe lezada lakohi.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika.

Iha prosesu julgamentu arguidu konfesa katak nia komete duni krime ne'e hasoru lezada. Lezada konfirma faktu sira iha akuzasaun hosi ministériu públiku no deklara ba tribunál katak nia perdua ona arguidu, sira hela hamutuk nu'udar feen ho laen hanesan bain-bain no nunca mósu problema to'o agora.

Iha alegasaun finál, ministériu públiku husu ba tribunál atu aplika suspensaun ba pena prizaun ba arguidu tanba arguidu komete duni violénsia doméstika hasoru nia feen.



Defeza husu ba tribunál atu aplika pena ne'ebé justu no adekudu ba arguidu tanba arguidu ho lezada di'ak malu ona, hela hamutuk nu'udar feen ho laen hanesan bai-bain no nunca mosu problema to'o agora.

Depois avalia faktu hirak ne'e hotu, tribunál konklui prosesu kazu ne'e hodi kondena arguidu ho pena prizaun tinan 2 suspende ba tinan 3.

### **11. Kazu krime ofensa ba integridade ba fízika simples ho natureza violénsia doméstika - Nú. 234/pen/2013/TDS**

|                      |   |
|----------------------|---|
| Kompozisaun Tribunál | : Singulár  |
| Juis                 | : Dr. Costáncio Barros Basmery                        |
| Ministériu Públiku   | : Dr. Mateus Nesi                                     |
| Defeza               | : Dr. Marcal Mascarenhas no Dr. Rafiel Gosmao         |
| Konkluzau            | : Kondena ho pena prizaun tinan 1 suspende ba tinan 2 |

Iha 24 Setembru 2014, Tribunál Distritál Suai liuhosi tribunál movel iha Distritu Bobonaro kondena arguidu EC ho pena prizaun tinan 1 suspende ba tinan 2. Tribunál prova katak arguidu komete krime ofensa ba integridade fízika simples hasoru nia feen. Kazu ne'e akontese iha 28 Marsu 2013, iha Distritu Bobonaro.

Ministériu públiku akuza katak iha 28 Marsu 2013, arguidu tuku lezada nia kabun dala rua no tuku dala ida iha ibun. Arguidu kontinua basa lezada nia hasan dala rua hodi rezulta kanek, moras no bubu iha nia ibun. Kazu ne'e akontese tanba arguidu husu lezada atu ko'us labarik ne'ebé tanis hela maibe lezada lakohi kous.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika.

Iha prosesu julgamentu, arguidu konfesa faktus ne'ebé ministériu públiku akuza hasoru nia. Nune'e mós lezada kontinua konfirma faktu sira iha akuzasaun ministériu públiku. Maske nune'e, lezada deklara katak nia perdua ona arguidu, sira hela hamutuk ona nu'udar feen ho laen no nunca mósu problema to'o agora.

Iha alegasaun finál, ministériu públiku husu ba tribunál atu kondena arguidu ho pena suspensaun ba arguidu tanba arguidu rasik konfesa katak nia komete duni krime ne'e hasoru nia feen.

Defeza husu tribunál atu aplika pena ne'ebé kmaan ba arguidu tanba arguidu ho lezada di'ak malu ona no sira hela hamutuk nu'udar feen ho laen hanesan bai-bain no nunca mosu problema to'o agora.

Bazeia ba provas hirak ne'e, tribunál konklui prosesu ne'e no kondena arguidu ho pena prizaun tinan 1 suspende ba tinan 2.

**12. Kazu krime ofensa ba integridade fízika simples ho natureza violénsia doméstika - Nú. Prosesu : 140/pen/2014/TDS**

Kompozisaun Tribunál : Singulár  
Juis : Dr. Costáncio Barros Basmery  
Ministériu Públiku : Dr. Antonio da Silva Tavares  
Defeza : Dr. Marcal Mascarenhas  
Konkluzau : Kondena ho pena prizaun tinan 1 suspende ba tinan 2

Iha 24 Setembru 2014, Tribunál Distritál Suai liuhosi tribunál movel iha Distritu Bobonaro kondena arguidu JD ho pena prizaun tinan 1 no suspende ba tinan 2. Tribunál prova katak arguidu komete duni krime ofensa ba integridade fízika simples hasoru nia feen. Kazu ne'e akontese iha 29 Jullu 2013, iha Distritu Bobonaro.

Ministériu públiku akuza katak iha 29 Jullu 2013, arguidu basa dala rua iha lezada nia hasan sorin karuk, tebe dala rua iha kabun no buti iha lezada nia kakorok. Akontesimentu ne'e rezulta lezada hetan kanek, no bubu iha nia hasan. Kazu ne'e akontese tanba lezada no arguidu diskuti malu kona-ba osan US\$40,00 ne'ebé arguidu uza ba joga lakon tiha.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika.

Iha prosesu julgamentu, arguidu konfesa no rekoñese katak nia komete duni krime ne'ebé haktuir iha akuzasaun ministériu públiku nian. Alende ne'e, lezada kontinua konfirma faktu sira ne'e maibé deklarara nia perdua ona arguidu, sira hela hamutuk ona nu'udar feen ho laen no nunka mósu problema to'o agora.

Iha alegasaun finál, ministériu públikú husu ba tribunál atu aplika pena multa ba arguidu tanba arguidu komete duni krime hasoru nia feen. Defeza argumenta katak arguidu no lezada diak malu ona, moris hamutuk nu'udar feen no laen hanesan bain-bain, laiha problema to'o agora, tanba ne'e, husu tribunál atu aplika pena ne'ebé kmaan.

Depois avalia faktus hotu ne'ebé produz durante julgamentu, tribunál konklui prosesu ne'e no kondena arguidu ho pena prizaun tinan 1 suspende ba tinan 2.

**13. Kazu krime ofensa ba integridade ba física simples ho natureza violéncia doméstika -  
Nú. Prosesu : 143/pen/2014/TDS**

Kompozisaun Tribunál : Singulár  
Juis : Dr. Costáncio Barros Basmery  
Ministériu Públiku : Dr. Antonio da Silva Tavares  
Defeza : Dr. Marcal Mascarenhas  
Konkluzan : Kondena ho pena multa US\$60,00

Iha 24 Setembru 2014, Tribunál Distritál Suai, liuhosi tribunál movel iha Distritu Bobonaro kondena arguidu JM ho pena multa US\$60 no selu kustu judisiál US\$25,00. Tribunál prova katak arguidu komete duni krime ofensa ba integridade física simples hasoru nia feen, ne'ebé akontese iha 02 Feveireiru 2013, iha Distritu Bobonaro.

Ministériu Públiku akuza katak iha 02 Feveireiru 2013, arguidu tuku lezada dala ida iha lezada nia matan fukun sorin karuk. Aktu ne'e rezulta kanek no ran iha lezada nia matan fukun. Kazu ne'e akontese tanba lezada lakohi halo susuben wainhira sira nia oan tanis. Tanba ne'e mak sira dikuti malu no arguidu nervozu hodi komete krime ne'e hasoru lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 alineaia (b) Lei Kontra Violéncia Doméstika.

Iha prosesu julgamentu arguidu konfesa no rekoñese faktus ne'ebé haktuir iha akuzasaun hosi ministériu públiku. Alende ne'e, lezada mós konfirma faktu sira iha akuzasaun ministériu públiku, maibe deklarara sira diak malu ona no to'o agora moris normal nu'udar feen no laen hanesan bain-bain.

Iha alegasaun finál, ministériu públiku husu ba tribunál atu aplika pena multa ba arguidu tanba arguidu konfesa katak nia komete duni krime hasoru lezada.

Defeza argumenta katak arguidu no lezada diak malu ona no to'o agora moris hanesan normal, tanba ne'e husu ba tribunál atu aplika pena ne'ebé justu no adekudu ba arguidu.

Depois rona tiha parte sira no avalia faktu sira relasiona ho kazu ne'e, tribunál konklui prosesu ne'e no kondena arguidu ho pena multa US\$60,00 no selu kustus judisiál US\$25,00 ba arguidu.

**14. Kazu krime ofensa ba integridade ba física simples ho natureza violéncia doméstika  
Nú.137/pen/2014/TDS**

Kompozisaun Tribunál : Singulár  
Juis : Dr. Costáncio Barros Basmery  
Ministériu Públiku : Dr. Antonio da Silva Tavares  
Defeza : Dr. Marcal Mascarenhas  
Konkluzan : Kondena ho pena multa US\$60

Iha 24 Setembru 2014, Tribunál Distritál Suai, lihuosi tribunál movel iha Distritu Bobonaro kondena arguidu VM ho pena multa US\$60,00 no selu kustu judisiál US\$10,00 tanba arguidu provadu komete krime ofensa ba integridade fízika simples hasoru nia feen. Kazu ne'e akontese iha 03 Abril 2013, iha Distritu Bobonaro.

Ministériu Públiku akuza katak iha 03 Abril 2013, arguidu baku dala hat iha lezada nia kotuk laran no ho aisar baku dala rua iha lezada nia liman karuk. Kazu ne'e akontese tanba lezada lakohi atu kous sira nia oan. Tanba ne'e sira dikuti malu to'o arguidu nervozu hodi baku lezada. Hosi akontesimentu ne'e rezulta lezada sofre kanek, bubu no moras iha lezada nia liman no kotuk laran.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika.

Durante julgamentu, arguidu konfesa faktu sira ne'ebé nia komete hasoru lezada. Alende ne'e, lezada mós kontinua reforsa faktu sira iha akuzasaun ministériu públiku. Maske nune'e lezada mós deklara katak sira dame malu ona no moris hanesan feen ho laen no nunka mosu problema to'o agora.

Iha alegasaun finál, ministériu públiku husu ba tribunál atu aplika pena multa no se tribunál iha hanoin seluk, ministériu públiku husu ba tribunál atu kondena arguidu ho pena suspensaun ba pena prizaun ne'ebé la bele menus husi loron 60.

Defeza husu husu ba tribunál atu aplika pena multa ne'ebé kmaan arguidu. Pena tenke replete sirkunstansia atenuantes sira hanesan arguidu no lezada diak malu ona no sira hela hamutuk nu'udar feen ho laen hanesan bai-bain no nunka mósu problema to'o agora.

Depois rona tiha parte sira, tribunál konklui prosesu kazu ne'e no kondena arguidu ho pena multa US\$60,00 ne'ebé arguidu sei selu US\$ 1,00 durante loron 60, plus selu kustu judisiál US\$10,00. Tribunál mós aplika pena alternativu durante loron 40 kumpri iha prizaun kuandu arguidu la selu pena multa refere.

**15. Kazu krime ofensa ba integridade ba fízika simples ho natureza violénsia doméstika - Nú. Prosesu : 146/pen/2014/TDS**

Kompozisaun Tribunál : Singulár  
Juis : Dr. Alvaro Maria Freitas  
Ministériu Públiku : Dr. Jose Elo  
Defeza : Dr. Manuel Amaral  
Konkluzau : Kondena ho pena prizaun fulan 3 suspende ba tinan 1

Iha 25 Setembru 2014, Tribunál Distritál Suai liuhosi tribunál movel iha Distritu Bobonaro kondena arguidu JN ho pena prizaun fulan 3 suspende tiha ba tinan 1. Tribunál prova katak arguidu komete duni krime ofensa ba integridade fízika simples hasoru nia feen, iha 29 Outubru 2012, iha Distritu Bobonaro.

Ministériu Públiku akuza katak arguidu basa dala rua iha lezada nia tilun hun sorin karuk no buti lezada nia kakorok no riba ba rai. Aktu hirak ne'e rezulta lezada sofre moras no bubu iha tilun hun. Kazu ne'e akontese tanba lezada lakohi atu arguidu haruka sira nia oan mane ba buka sira nia karau ne'ebé lakon.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika.

Iha julgamentu produsaun ba provas, arguidu konfesa no rekoñese katak nia komete duni krime ne'e hasoru lezada hanesan nia feen. Alende ne'e, lezada mós kontinua reforsa katak arguidu basa nia dala rua, buti nia kakorok no riba ba rai. Maibé lezada mós deklara katak sira diak malu ona, moris hamutuk fila fali hanesan feen no laen no nunka mósu problema to'o agora.

Iha alegasaun final, ministériu públiku husu ba tribunál atu aplika pena multa ne'ebé arguidu sei selu durante loron 90. Entretantu defeza husu tribunál atu aplika pena multa ne'ebé kmaan bazeia ba sirkunstansia atenuantes sira hanesan arguidu ho lezada diak malu ona, moris hamutuk hanesan feen no laen no nunka mósu problema to'o agora.

Depois avalia faktus ne'ebé produz durante julgamentu, tribunál konklui prosesu ne'e no kondena arguidu ho pena prizaun fulan 3 suspende ba tinan 1.

#### **16. Kazu krime ofensa ba integridade fízika simples - Nú. Prosesu : 152/pen/2014/TDS**

Kompozisaun Tribunál : Singulár  
Juis : Dr. Alvaro Maria Freitas  
Ministériu Públiku : Dr. Jose Elo  
Defeza : Dr. Jose do Rego  
Konkluzau : Omologa

Iha 25 Setembru 2014, Tribunál Distritál Suai liuhosi tribunál movel iha Distritu Bobonaro omologa prosesu hasoru arguidu DL no RL ne'ebé komete ofensa integridade fízika simples hasoru JB, ne'ebé akontese iha Distritu Bobonaro.

Tribunál omolaga prosesu ne'e, tanba lezadu deklara katak nia perdua ona arguidu sira no hakarak dada fila fali kazu ne'e. Aleinde ne'e, arguidu sira mós promete atu la repete tan krime hanesan iha futuru.

**17. Kazu krime ofensa ba integridade ba fízika simples ho natureza violénsia doméstika - Nú. Prosesu : 185/pen/2014/TDS**

Kompozisaun Tribunál : Singulár  
Juis : Dr. Alvaro Maria Freitas  
Ministériu Públiku : Dr. Jose Elo  
Defeza : Dr. Rafael Gusmáo  
Konkluzau : Kondena ho pena prizaun tinan 1 suspende ba tinan 1

Iha 25 Setembru 2014, Tribunál Distritál Suai liuhosi tribunál movel iha Distritu Bobonaro kondena arguidu PD ho pena prizaun tinan 1 suspende ba tinan 1, tanba provadu komete krime ofenda ba integridade fízika simples hasoru nia feen. Kazu ne'e akontese iha 04 Marsu 2014, iha Distritu Bobonaro.

Ministériu Públiku akuza katak iha 04 Marsu 2014, arguidu tuda rahun lezada ninia telemovel no uza fiu baku dala ida iha lezada nia kotuk laran hodi rezulta bubu iha lezada nia kotuk laran. Kazu ne'e akontese tanba arguidu diskunfia lezada koalía ho mane seluk liuhosi telefone. Tanba ne'e arguidu nervozu no komete krime ne'e hasoru lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika

Iha prosesu julgamentu, arguidu konfesa faktu sira ne'e no rekoñese ninia hahalok ne'ebé nia halo hasoru lezada.

Iha alegasaun finál, ministériu públiku husu ba tribunál atu kondena arguidu ho pena prizaun fulan 3 no suspende ba tinan 1. Defeza husu ba tribunál atu aplika pena multa ne'ebé kmaan ba arguidu tanba arguidu ho lezada di'ak malu ona no sira hela hamutuk nu'udar feen ho laen hanesan bai-bain no nunka mósu problema to' o agora.

Bazeia ba faktu sira ne'ebé produz durante julgamentu, tribunál konklui prosesu ne'e no kondena arguidu ho pena prizaun tinan 1 suspende ba tinan 1.

## **18. Kazu krime abuzu seksuál ba menóridade - Nú. Prosesu : 37/pen/2012/TDS**

|                      |   |
|----------------------|---|
| Kompozisaun Tribunál | : Koletivu  |
| Juis                 | : Dr. Pedro R. de Figueiredo, Dr. Costancio B. Basmerly no Dr. Argentino L. Nunes |
| Ministériu Públiku   | : Dr. Mateus Nesi no Dr. Antonio da Silva Tavares                                 |
| Defeza               | : Dr. Manuel Amaral no Dr. Joao H. De Carvalho                                    |
| Konkluzau            | : Kondena ho pena prizaun tinan 3 suspende ba tinan 4                             |

Iha 25 Setembru 2014, Tribunál Distritál Suai liuhosi tribunál movel iha Distritu Bobonaro kondena arguidu FMS ho pena prizaun tinan 3 no suspende ba tinan 4 tanba tribunál prova katak arguidu komete krime abuzu seksuál ba IB ne'ebé sei ho idade menor. Kazu ne'e akontese iha 01 Janeiru 2010 iha Distritu Bobonaro.

Ministériu Públiku akuza katak iha 01 Janeiru 2010, katak arguidu buti metin lezada nia ibun no obriga lezada halo relasaun seksuál ho lezada mesmu lezada lakohi. Aktu ne'e rezulta lezada isin rua no partu oan feto ida.

Ministériu Públiku akuza arguidu kontra artigu 177 Kódigu Penál ne'ebé nia moldura penál husi tinan 5 to'o tinan 15 prizaun.

Iha prosesu julgamentu arguidu konfesa ho faktus sira tuir akuzasaun ministériu públiku. Iha alegasaun finál, ministériu públiku husu ba tribunál atu kondena arguidu ho pena prizaun tinan 12. Entretantu parte defeza husu ba tribunál atu aplika pena ne'ebé justu no adekudu ba arguidu.

Depois rona tiha alegasaun finál hosi parte sira, tribunál marka fali prosesu julgamentu ba 10 Outubru, tuku 03:00 lorokraik ho agenda rona leitura sentensa.

## **19. Kazu krime ofensa ba integridade fízika simples ho natureza violénsia doméstika - Nú. Prosesu : 150/pen/2013/TDS**

|                      |   |
|----------------------|---|
| Kompozisaun Tribunál | : Singulár  |
| Juis                 | : Dr. Alvaro Maria Freitas                            |
| Ministériu Públiku   | : Dr. Jose Elo  |
| Defeza               | : Dr. Manuel Amaral                                   |
| Konkluzau            | : Kondena ho pena prizaun fulan 1 suspende ba tinan 1 |

Iha 25 Setembru 2014, Tribunál Distritál Suai liuhosi tribunál movel iha Distritu Bobonaro kondena arguidu MF ho pena prizaun tinan 1 no suspende ba tinan 1, tanba provadu komete

krime ofensa ba integridade fízika simples hasoru nia feen. Kazu ne'e akontese iha 22 Abril 2012, iha Distritu Bobonaro.

Ministériu Públiku akuza katak iha 22 Abril 2012, arguidu tuku dala rua iha lezada nia matan fukun sorin loos no tebe dala ida iha lezada nia kanotak. Aktu ne'e rezulta lezada hetan kanek no bubu iha matan fukun. Kazu ne'e akontese tanba arguidu haruka lezada ba natar maibé lezada lakohi tanba ne'e arguidu nervozu no komete krime ne'e hasoru lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika.

Iha prosesu julgamentu, arguidu konfesa no rekoñese ninia hahalok ne'ebé nia komete hasoru lezada. Alende ne'e, lezada kontinua konfirma faktu sira iha akuzasaun ministériu públiku maibe deklarara katak sira dame malu ona no moris hamutuk nu'udar feen no laen no nunca mósu problema to'o agora.

Iha alegasaun finál, ministériu públiku husu ba tribunál atu kondena arguidu ho pena prizaun fulan 3 no suspende ba tinan 1.

Entretantu defeza husu tribunál atu fó pena ne'ebé kmaan ba arguidu tanba arguidu ho lezada di'ak malu ona no sira hela hamutuk ona nu'udar feen no laen hanesan bai-bain no nunca mosu problema to'o agora.

Bazeia ba faktu sira ne'ebé produz durante julgamentu, tribunál konklui kazu ne'e no kondena arguidu ho pena prizaun fulan1 suspende ba tinan 1.

**20. Kazu krime ofensa ba integridade fízika simples ho natureza violénsia doméstika - Nú. Prosesu : 179/pen/2014/TDS**

Kompozisaun Tribunál : Singulár  
Juis : Dr. Alvaro Maria Freitas  
Ministériu Públiku : Dr. Jose Elo  
Defeza : Dr. Jose do Rego  
Konkluzau : Kondena ho pena prizaun fulan 3 suspende ba tinan 2

Iha 25 Setembru 2014, Tribunál Distritál Suai, liuhosi tribunál movel iha Distritu Bobonaro kondena arguidu DB ho pena prizaun fulan 3 suspende ba tinan 2. Tribunál prova katak arguidu komete duni krime ofensa ba integridade fízika simples hasoru nia oan rasik. Kazu ne'e akontese iha 13 Junu 2014, iha Distritu Bobonaro.



Ministériu Públiku akuza katak iha 13 Juñu 2014, arguidu lori sintu baku dala barak iha lezada nia isin. Aktus ne'e no rezulta lezada sofre moras no bubu iha lezada nia isin .

Kazu ne'e akontese tanba arguidu dun lezada foti nia avo nia osan maibé lezada rezeita katak la'os nia mak foti. Tanba ne'e arguidu nervozu no baku lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alinea (b) Lei Kontra Violénsia Doméstika.

Iha prosesu julgamentu arguidu konfesa totalmente ba faktus sira ne'ebé ministériu públiku akuza hasoru arguidu. Iha alegasaun finál, ministériu públiku husu ba tribunál atu kondena arguidu ho pena suspensaun.

Entretantu defeza husu tribunál atu aplika pena ne'ebé kmaan ba arguidu tanba arguidu ho lezada di'ak malu ona no sira hela hamutuk nu'udar aman ho oan no nunca mósu problema to'o agora.

Depois avalia faktu hira ne'ebé produs durante julgamentu, tribunál konklui prosesu ne'e no kondena arguidu ho pena prizaun fulan 3 suspende ba tinan 2.

## **21. Kazu krime ofensa ba integridade fízika simples - Nú. Prosesu : 141/pen/2014/TDS**

|                      |                            |
|----------------------|----------------------------|
| Kompozisaun Tribunál | : Singulár                 |
| Juis                 | : Dr. Alvaro Maria Freitas |
| Ministériu Públiku   | : Dr. Jose Elo             |
| Defeza               | : Dr. Jose do Rego         |
| Konkluzau            | : Adia                     |

Iha 26 Setembru 2014, Tribunál Distritál Suai liuhosi tribunál movel iha Distritu Bobonaro adia prosesu julgamentu ba kazu krime ofensa ba integridade simples ne'ebé diskunfia involve arguidu AdA hasoru lezadu VS. Kazu ne'e akontese, iha Distritu Bobonaro.

Tribunál adia julgamentu ba kazu ne'e tanba arguidu la konsege notifika. Tanba ne'e, tribunál adia prosesu julgamentu ba iha 17 Outubru 2014, tuku 11:30 dader.

## **22. Kazu krime ofensa ba integridade fízika simples ho natureza violénsia doméstika - Nú. Prosesu : 179/pen/2014/TDS**

|                      |                            |
|----------------------|----------------------------|
| Kompozisaun Tribunál | : Singulár                 |
| Juis                 | : Dr. Alvaro Maria Freitas |
| Ministériu Públiku   | : Dr. Jose Elo             |

Defeza : Dr. Jose do Rego  
Konkluzau : Adia

Iha 26 Setembru 2014, Tribunál Distritál Suai liuhosi tribunál movel iha Distritu Bobonaro adia prosesu julgamentu ba kazu krime ofensa ba integridade fízika simples ne'ebé diskunfia involve arguidu IL hasoru oan. Kazu ne'e akontese, iha 13 Juñu 2014, Distritu Bobonaro.

Tribunál adia julgamentu ne'e tanba la konsege notifika ba arguidu. Tanba ne'e, tribunál adia prosesu julgamentu ba iha 17 Outubru 2014, tuku 02:30 lorokraik.

**23. Kazu krime ofensa ba integridade fízika simples ho natureza violénsia doméstika - Nú. Prosesu : 111/pen/2014/TDS**

Kompozisaun Tribunál : Singulár  
Juis : Dr. Alvaro Maria Freitas  
Ministériu Públiku : Dr. Jose Elo  
Defeza : Dr. Jose do Rego  
Konkluzau : Adia

Iha 26 Setembru 2014, Tribunál Distritál Suai, liuhosi tribunál movel iha Distritu Bobonaro adia mós prosesu julgamentu ba kazu krime ofensa ba integridade fízika simples ne'ebé involve arguidu GM hasoru DAM. Kazu ne'e akontese, iha Distritu Bobonaro.

Tribunál adia julgamentu ba kazu ida ne'e tanba tribunál halo notifikasaun ba arguidu. Tanba ne'e, tribunál adia fali julgamentu ba iha 17 Outubru 2014, tuku 03:00 lorokraik.

**24. Kazu krime ofensa ba integridade fízika simples ho natureza violénsia doméstika - Nú. Prosesu : 147/pen/2014/TDS**

Kompozisaun Tribunál : Singulár  
Juis : Dr. Alvaro Maria Freitas  
Ministériu Públiku : Dr. Jose Elo  
Defeza : Dr. Jose do Rego  
Konkluzau : Adia

Iha 26 Setembru 2014, Tribunál Distritál Suai liuhosi julgamentu movel iha Distritu Bobonaro adia prosesu julgamentu ba kazu krime ofensa ba integridade fízika simples ne'ebé involve arguidu GL hasoru CCV. Kazu ne'e akontese, iha Distritu Bobonaro.

Tribunál adia julgamentu ba kazu ne'e tanba tanba tribunál la halo notifikasaun ba arguidu. Tanba ne'e tribunál adia prosesu julgamentu ba iha 16 Outubru 2014, tuku 11:00 dader.

**25. Kazu krime ofensa ba integridade física simples ho natureza violéncia doméstika - Nú. Prosesu : 150/pen/2014/TDS**

Kompozisaun Tribunál : Singulár  
Juis : Dr. Alvaro Maria Freitas  
Ministériu Públiku : Dr. Jose Elo  
Defeza : Dr. Jose do Rego  
Konkluzau : Adia

Iha 26 Setembru 2014, Tribunál Distritál Suai liuhosi tribunál movel iha Distritu Bobonaro adia mós prosesu julgamentu ba kazu krime ofensa ba integridade física simples ne'ebé diskunfia involve arguidu QMN hasoru MM. Kazu ne'e akontese iha Distritu Bobonaro.

Julgamentu ba kazu ne'e mós adia tanba tribunál la haruka notifikasaun ba arguidu. Tanba ne'e, tribunál marka fila fali lora julgamentu ba iha 16 Outubru 2014, tuku 09:00 dader.

**26. Kazu krime ofensa ba integridade ba física simples ho natureza violéncia doméstika - Nú. Prosesu : 236/pen/2014/TDS**

Kompozisaun Tribunál : Singulár  
Juis : Dr. Alvaro Maria Freitas  
Ministériu Públiku : Dr. Jose Elo  
Defeza : Dr. Jose do Rego  
Konkluzau : Adia

Iha 26 Setembru 2014, Tribunál Distritál Suai liuhosi tribunál movel iha Distritu Bobonaro kontinua adia prosesu julgamentu ba kazu krime ofensa ba integridade física simples ne'ebé diskunfia involve arguidu MN hasoru RM. Kazu ne'e akontese, iha Distritu Bobonaro.

Tribunál adia prosesu julgamentu ba kazu ne'e tanba tribunál la konsege notifika arguidu. Tanba ne'e, tribunál marka fila fali prosesu julgamentu ba iha 16 Outubru 2014, iha tuku 14:00 dader.

**27. Kazu krime ofensa ba integridade física simples ho natureza violéncia doméstika - Nú. Prosesu : 145/pen/2014/TDS**

Kompozisaun Tribunál : Singulár  
Juis : Dr. Alvaro Maria Freitas

Ministériu Públiku : Dr. Jose Elo  
Defeza : Dr. Jose do Rego  
Konkluzau : Adia

Iha 26 Setembru 2014, Tribunál Distritál Suai, liuhosi tribunál movel iha Distritu Bobonaro kontinua mós adia prosesu julgamentu ba kazu krime ofensa ba integridade fízika simples ne'ebé diskunfia involve arguidu JB hasoru CA. Kazu ne'e akontese, iha Distritu Bobonaro.

Tribunál adia prosesu julgamentu ba kazu ne'e ho razaun hanesan katak tribunál la konsege notifika arguidu. Tribunál marka fila fali prosesu julgamentu ba iha 16 Outubru 2014, iha tuku 11:30 dader.

Atu hetan informasaun kle'an favor kontaktu direktamente:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
[info@jsmp.minihub.org](mailto:info@jsmp.minihub.org)  
telefone: 3323883/77295795  
webiste: [www.jsmp.tl](http://www.jsmp.tl)  
facebook [www.facebook.com/timorleste.jsmp](http://www.facebook.com/timorleste.jsmp)  
twitter: @JSMPTl